

INUIT ATAQATIGIIT

Inatsisartuni



22. august 2018

UKA 2018/228

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Qamutit motorillit akileraarutaat pillugit Inatsisartut inatsisissaanni ATV-nut akitsuut ukiumut ataasiaannartumik akiligassanngoqqullugu, akitsuutillu 50 pct-mik appartinneqarnissaanut Naalakkersuisut UKA2019-imut inatsimmut allannguutissatut siunnersuusioqqullugit peqquneqarnissaannik Inatsisartut aalajangiiffissaattut siunnersuut.

(Inatsisartunut ilaasortaq Stine Egede, Inuit Ataqatigiit)

Tungavilersuut:

Nunatsinni ATV-t tulluartaummata akitsuutit aamma naapertuunnerusumik tulluarsarnissaannguut siunnersuuteqarnissaq pisariaqalerpoq.

Kalaallit Nunaanni, pingaartumik kujataani uumasuuteqarfinni/nunaateqarfinni ATV-it amerligaluttuinnartut atugaalernikuupput. Ajoraluartaumilli amerlasoorparujussuit normulerneqarneq ajorput, taamaalillutillu sillimmaqarnatik ingerlaartarlutik, tamannalu inerteqqutaavoq. Tamannalu akuersaaruminaappoq, ajutoornerimmi takujualernikuuvagut, ilaatigut inuup inuuneranik naleqartartut.

Taamaattumik qamutit taakku siunissami sillimmasertarnissaat avaqqussinnaanngilarput, taamaalillutillu normulersorneqalerlutik. Amerlasuut ilaatigut "merserinninneq" tungavigalugu normulerneq ajorput, tassami aasaanerinnaani, ilaanni ulluni 14-iinnarni imal. qaammat ataasiinaq ATV atortaramikku. Ullumikkut forsikring ukiumut 1200 - 1300 missaanniippoq, kialluummiit tamanna akissaqarfigaa. Eqqussinermi akitsuut (indførselsafgift) 5000 aamma qamutinik taamaattumik piserusuttup akissaqarfigaa, taamaammallu sillimmamut akiliinissamut aamma akissaqarput.

Aporfigineqartuortorli tassa aqqusinermi angallannermi akitsuut (vægtafgift) ukiumut 6.554,- kr-eqartoq amerlasuut akilerumangisaat akisugalugu/ingasagalugu, taamaalillutik pitsaanerutikkaat sillimmaqaratillu akitsuummik akiliinngikkunik. Tamanna akitsuutip apparneriatiqut aaqquivigineqarsinnaavoq.

Tassunga atatillugu qamutit motorillit savaatilinnit tuttuutilinnillu pigineqarlutillu inuussutisarsiornermi atorpeqartut ilaatigut akitsuummik akiliisussaangereernerat Inuit Ataqatigiit ilisimaaraat.

Ukioq manna 10. Augustip tungaanut qamutit motorillit akitsuuserneqarnerat pillugu Inatsisartut inatsisaannik allannguinissamik siunnersuutip tusarniaassutaanera Inuit Ataqatigiit ilisimaaraat, tassanilu ilaatigut qamutitut motorilinnut nunakkoorutitut minnerit (qamuterallannullu) akitsuut 0,00 kr-inggortinneqarnissaa siunnersuutigineqarpoq.

Inuit Ataqatigiilli qamutit motorillit nunakkoorutit minnerit akitsuummik akiliisinneqartarunnaavinnissaat isumaqatigisinnaangilaat, qamutinimmi motorilinnik taamaattunik pigisaqartut arlaatigut akitsuummik suugaluarnersumik aamma akiliisinneqartariaqartut IA isumaqarmat. Ingammik avatangiisut qamutit motorillit innarliisarnerat eqqarsaatigalugu.

Taamaammat ATV-nut qamutitut motorilinnut akileraarut affaanngortinneqassasoq, akitsuullu siunissami ukiumut ataasiaannarluni akilerneqartalissasoq Inuit Ataqatigiit siunnersuutigaat. Tamannalu amerlanerit qamutinimmi motorilinnik nalunaarsortitsinissamik kaammattuutaassaaq, taamaalillutillu aamma sillimmaserneqartalissallutik.

Pisortanut aningaasatigut allaffissornikkullu kingunerisassai:

Qamutit motorillit akitsuuserneqartarnerannik Inatsisartut inatsisaata allanngortinneqarnissaa pillugu siunnersuut, ulloq 10. august tungaanut tusarniaassutaasoq naapertorlugu qamutit motorillit nunakkoorutit minnerit akitsuummik akiliisinneqartarunnaavinnissaat 2 million kr-inik isertitatigut annaasaqaataassaaq¹. Taamaamallu akitsuummik affaanngortitsineq 1 million kr-it missaannik annaasaqaataasussatut naatsorsuutigineqartariaqassalluni. Tassanilu isertitassanik annaasaqaatip ilaata ATV-nik pigisaqartut qamutinimmi motorilinnik nalunaarsortitsinerisigut, taamaalillutillu qamutit motorillit akitsuutaannik akiliisalernermikkut annikinnerulersinneqarnissaa naatsorsuutaavoq.

Akiliisarnerit allanngortinneqarnerannut atatillugu tamanna allaffissornermut annertuumik annertunerulersitsisussatut naatsorsuutaangilaq, taamaattoq akileraaruserinermik ingerlatsiviup siunissami qamutit motorillit oqimaassusaat apeqqutaatillugu maleruagassanik arlalinnik malitassaqaalernerisigut allaffissorneq arlaatigut annertusisinnaavoq.

Allannguutissatut siunnersuummik suliaqarnissamut atatillugu taanna AC-fuldmægtigip ukiup affaanik nalilimmik sulineranik naleqassaaq, tassa 250.000 kr.-iussasut naatsorsuutigineqassaaq.

Namminersortunut aningaasaatigut allaffissornikkullu kingunerisassai:

¹ Takukkit ”uunga siunnersuut: Qamutit motorillit akileraarutaat pillugit Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2018-imeersoq” (q. 6).

Siunnersuut ATV-nik atuisunut iluaqutaassaaq, taakkumi ATV-it assartuinnermut atornerulersinnaalissavaat. Taamaalillunilu taakku aningaasaqarnikkut iluaqutserneqassapput, aningaasallu taakku inuussutissarsiummik toqqammavigisaminnik ineriartortitsinnermi atorsinnaavaat.

Siunnersuut ATV-nik piginnittut siunissami sillimmasiisalererat ilutigalugu sillimmasiisarfinnut iluaqutsiissaaq, taamaaliornikkullu inunnik pigisanillu ajoqusiinnermi taarsiinnermik pisariaqalersitsisarneq pinngitsoortinneqassalluni.

Aningaasaqarnikkut allaffissornikkullu innuttaasunut kingunissai:

Innuttaasut manna tikillugu nalunaarsuinnermi, akitsuummut sillimmasiisarnermullu akiliisariingitsut siunissami taamaaliortalernermikkut innuttaasunut aningaasatigut allaffissornikkullu kinguneqaateqassaaq. Innuttaasulli taamaaliornermi ukioq kaajallallugu ATV-minnik atuisinnaalissapput – soorluttaaq innuttaasut ajutoortoqartillugu pitsaanerusemik inissimalissasut (pigisanik inunnillu ajoqusiinnermi).